

Na osnovu člana 16. stav 4. Zakona o Vladi Zeničko-dobojskog kantona - Prečišćen tekst ("Službene novine Zeničko-dobojskog kantona" broj 07/10), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 205. sjednici, održanoj 17.02.2015. godine, d o n o s i

ZAKLJUČAK

I.

(1) Daje se saglasnost na Projekat Ministarstva za rad, socijalnu politiku i izbjeglice "Izgradnja zgrade Dnevnog centra za djecu i odrasle osobe s posebnim potrebama u općini Žepče", za korisnike sa područja općina Maglaj, Zavidovići i Žepče.

(2) Projekat će se realizovati u partnerstvu Ministarstva za rad, socijalnu politiku i izbjeglice, Općine Žepče, Ustanove „Dnevni centar za djecu sa posebnim potrebama“ Maglaj i Udruženja "Humanost – societas humanitatis" (u daljem tekstu: učesnici Projekta).

II.

(1) O provedbi Projekta iz tačke I, stav (1) ovog zaključka, učesnici Projekta će potpisati Ugovor o međusobnim pravima i obavezama ugovornih strana tokom realizacije Projekta.

(2) Ovlašćuje se ministar Ministarstva za rad, socijalnu politiku i izbjeglice da pristupi potpisivanju Ugovora o provedbi projekta iz tačke I. stav (1) ovog zaključka.

III.

Zadužuju se učesnici Projekta da realizuju ukupne aktivnosti ovog Projekta, u skladu sa zakonom i podzakonskim aktima, svako u okviru svojih nadležnosti.

IV.

Zaključak stupa na snagu danom donošenja.

Broj: 02-_____/15.

Datum, 17.02.2015. godine

Zenica

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo za rad, socijalnu politiku i izbjeglice,

1x Općina Žepče, putem Ministarstva,

1x Ustanova „Dnevni centar za djecu s posebnim potrebama“ Maglaj, putem Ministarstvu,

1x Udruženje "Humanost – societas humanitatis", putem Ministarstva,

1x a/a

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
MINISTARSTVO ZA RAD, SOCIJALNU POLITIKU I IZBJEGLICE
broj: _____/15
Zenica, _____ 2015. godine

P R O J E K A T

“Izgradnja zgrade Dnevnog centra za djecu i odrasle osobe
s posebnim potrebama u općini Žepče“,
za korisnike sa područja općina Maglaj, Zavidovići i Žepče

Zenica, februar 2015. godine

1. Uvod

Ratifikacijom Konvencije UN-a o pravima osoba s invaliditetom od strane Parlamenta Bosne i Hercegovine u decembru 2009. godine, sve nadležne institucije vlasti u BiH su dobile obavezu da se aktivno zalažu za integraciju osoba sa posebnim potrebama u društvo, te da postepeno otklone sva diskriminirajuća ograničenja. Ova integracija se odnosi na sva područja individualnog i društvenog života i ima zadatak da osobama s invaliditetom omogući pravo na adekvatnu socijalnu i zdravstvenu zaštitu, školovanje, stanovanje i rad.

Vlada Zeničko-dobojskog kantona se još od 2006. godine u saradnji sa općinskim upravama i organizacijama civilnog društva intenzivno bavi razvojem raznih vidova dnevnog zbrinjavanja djece i odraslih osoba s posebnim potrebama u Zeničko-dobojskom kantonu, što je rezultiralo osnivanjem JU Centar za djecu i osobe s posebnim potrebama Zeničko-dobojskog kantona. Namjera je da se u sastav ove Ustanove, kao poslovne jedinice, uključe i postojeći Dnevni centri koji djeluju u općinama Maglaj i Visoko.

Dnevni centar za djecu sa posebnim potrebama Maglaj djeluje od 2006. godine sa ciljem pružanja usluga djece i mlade osobe školskog uzrasta sa posebnim potrebama sa područja općina Maglaj, Žepče i Zavidovići. Ovaj Dnevni centar je jedan od prvih rezultata aktivnosti Vlade Zeničko-dobojskog kantona na području izgradnje novih decentralizovanih struktura dnevnog zbrinjavanja za osobe sa posebnim potrebama u Zeničko-dobojskom kantonu.

Prizemni prostor objekta JU Centra za socijalni rad Maglaj se koristi za obavljanje aktivnosti, odnosno za pružanje usluga i kasnije djelovanje Ustanove „Dnevni centar za djecu s posebnim potrebama“ Maglaj (u daljem tekstu: Ustanova). Objekat JU Centar za socijalni rad izgrađen je iz sredstava donacije Pakta za stabilnost za jugoistočnu Evropu Vlade SR Njemačke, iz sredstava budžeta Zeničko-dobojskog kantona i sredstava donacije njemačke fondacije „Učenici pomažu život“ (Schueler helfen Leben).

Na projektnoj osnovi Dnevni centar za djecu sa posebnim potrebama Maglaj djelovao je od decembra 2006. godine do kraja 2011. godine kad je osnovana Ustanova. Ciljna grupa Ustanove su djeca i mlade osobe školskog uzrasta sa posebnim potrebama sa područja općina Maglaj, Žepče i Zavidovići. Jedna grupa odraslih osoba sa posebnim potrebama je od 2008. godine uključena u rad Ustanove kroz radno terapijske aktivnosti u radionici Ustanove.

Do osnivanja Ustanove, Dnevni centar se finansirao kao projektni zadatak iz Budžeta Zeničko-dobojskog kantona, općina Maglaj, Žepče i Zavidovići, a udruženje „Humanost – societas humanitatis“ kao implementing partner, obezbjeđivalo je donatorska sredstva za prve dvije godine rada Dnevnog centra.

Ustanova se danas finansira na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11), odnosno iz Budžeta Zeničko-dobojskog kantona, te iz budžeta tri navedene općine sa čijih područja dolaze korisnici.

Ustanova već duže vremena ima potrebu za širenjem prostornih kapaciteta zbog konstantnog rasta broja korisnika. Isto tako i JU Centar za socijalni rad Maglaj ima problem sa proširenjem kancelarijskog prostora radi povećanja obima usluga koje pružaju korisnicima socijalne zaštite. Usljed katastrofalnih poplava u maju 2014. godine uništene su prostorije, inventar i vozni park Ustanove.

Njemački partner u saradnji sa Ustanovom i Udruženjem „Humanost – societas humanitatis“, ponudio je Ministarstvu za rad, socijalnu politiku i izbjeglice izgradnju nove zgrade na novoj lokaciji kako bi bile zadovoljene potrebe i JU Centra za socijalni rad Maglaj i Ustanove. Također, namjera je da se realizacijom ove inicijative smanji rizik od ponovnog plavljenja Ustanove, kao i devastacija prostorija i inventara. Ipak, imajući u vidu novoopremljene i uređene prostorije u kojima trenutno djeluje Ustanova u Maglaju, te da je objekat u kojem djeluju dvije navedene ustanove izgrađen s ciljem zajedničkog djelovanja i povećanja dostupnosti usluga za djecu i odrasle s posebnim potrebama, određeni kapaciteti u prizemlju zgrade JU Centra za socijalni rad Maglaj i dalje će se koristiti za rad sa djecom koja imaju poteškoću da putuju u općinu Žepče i odrasle osobe

za koje su već uspostavljene radno-okupacione aktivnosti. Na ovaj način, nastaviti će se rad i u općini Maglaj u vidu ispostave Kantonalne JU Centar za djecu i odrasle osobe s posebnim potrebama.

Upravni odbor Ustanove je prihvatio inicijativu njemačkih partnera i kandidovao općinama Maglaj, Žepče i Zavidovići da predlože lokacije za izgradnju nove zgrade Ustanove u skladu sa inicijativom partnerske organizacije Terra Tech Foerderprojekte e.V. iz Njemačke. Općina Žepče je prihvatila inicijativu dopisom broj 01/1-05-999/14 od 10.10.2014. godine. Na sjednici održanoj 5. novembra 2014. godine Upravni odbor Ustanove donio je odluku o prihvatanju prijedloga Općine Žepče o dodjeljivanju zemljišta za izgradnju nove zgrade.

Također Ustanova se još u oktobru 2014. godine obratila Ministarstvu za rad, socijalnu politiku i izbjeglice Zeničko-dobojskog kantona sa inicijativom da bude partner u projektnom zadatku izgradnje nove zgrade Ustanove. Ministarstvo je prihvatio ovu inicijativu i potvrdilo namjeru da uzme učešće u sufinansiranju projekta imajući na umu da Ustanova predstavlja jedan bitan faktor u mreži usluga za osobe s posebnim potrebama u Zeničko-dobojskom kantonu, te da će Ustanova biti u sastavu Kantonalne Javne ustanove Centar za djecu i osobe s posebnim potrebama Zeničko-dobojskog kantona.

Imajući u vidu navedeno, neophodno je da partneri na Projektu usko sarađuju sa JU Centar za djecu i odrasle s posebnim potrebama Zeničko-dobojskog kantona.

2. Opis projekta:

Nova zgrada u kojoj će djelovati Ustanova bit će prizemni objekat sa oko 850 m², a uz objekat se planira kao prateći sadržaj prilazni put sa parkingom, igralište i vrt (sa platenikom). Zgrada će biti izgrađen u skladu sa Pravilnikom o standardima za rad i pružanje usluga u ustanovama socijalne zaštite u Federaciji BiH („Sl. novine Federacije BiH“, broj: 15/13).

Prema sadašnjim procjenama orijentaciona vrijednost ovog projekta iznosi 780.000 €, odnosno 1.530.000,00 KM, a projekat će se realizovati kroz: izgradnju zgrade Ustanove, opremanje prostorija Ustanove, vanjsko uređenje i izgradnju igrališta i rad sa javnošću.

Partneri u ovom Projektu su:

- Vlada Zeničko-dobojskog kantona – Ministarstvo za rad, socijalnu politiku i izbjeglice,
- Općina Žepče,
- Ustanova “Dnevni centar za djecu sa posebnim potrebama” Maglaj i
- Udruženje „Humanost – societas humanitatis“ iz Zenice.

Partneri će usko sarađivati sa JU Centar za djecu i odrasle osobe s posebnim potrebama Zeničko-dobojskog kantona.

Projekat će se realizovati udruživanjem sredstava:

- Vlade Zeničko-dobojskog kantona,
 - Općine Žepče,
 - Vlade SR Njemačke i sredstava obezbjeđenih iz privatnih donacija u SR Njemačkoj.
- Sredstva iz SR Njemačke biti će obezbjeđena posredstvom humanitarne organizacije „Terra Tech e.V.“ iz Marburga i Udruženja “Humanost – societas humanitatis” iz Zenice, koje su u partnerskom odnosu.

Implementacija projekta u dijelu koji se odnosi na ukupne aktivnosti obezbjeđenja sredstava od donatora i izgradnje poslovne zgrade Ustanove i dr. planiranih aktivnosti, biti će povjerena Udruženju “Humanost – societas humanitatis” o čemu će se potpisati poseban ugovor između učesnika projekta (Zeničko-dobojski kanton – Ministarstvo za rad, socijalnu politiku i izbjeglice, Općina Žepče, Ustanova “Dnevni centar za djecu sa posebnim potrebama” Maglaj i Udruženje “Humanost – societas humanitatis”). Projekat izgradnje objekta Ustanove planira se u period od godinu dana počevši od dana polaganja kamena temeljca koji se planira za maj 2015. godine.

3. Korisnici projekta:

Direktni korisnici:

- Djeca i mladi s posebnim potrebama školskog uzrasta koji ne pohađaju redovni školski proces, sa smetnjama u psihičkom razvoju - umjerenog i teškog stepena, te odrasle osobe s posebnim potrebama sa područja općina Maglaj, Žepče i Zavidovići;
- Roditelji/ staratelji djece i mladih s posebnim potrebama.

4. Osvrt na ciljeve

4.1. Opći cilj:

- Unaprijeđenje usluga za djecu i odrasle osobe s posebnim potrebama sa područja općina Žepče, Maglaj i Zavidovići, odnosno obezbjeđenje pretpostavki za svrsishodnije pružanje usluga JU Centar za djecu i odrasle osobe s posebnim potrebama Zeničko-dobojskog kantona.

4.2. Cilj projekta:

- Obezbjedenje kvalitetnijih prostornih i tehničkih pretpostavki za djelovanje Ustanove „Dnevni centar za djecu i odrasle osobe sa posebnim potrebama“ u općini Žepče.

4.2. Očekivani rezultati projekta:

- 4.2.1. Izgrađen i opremljen objekat za djelovanje Ustanove na području općine Žepče;
- 4.2.2. Izvršeno vanjsko uređenje dvorišta i izgradnja igrališta;
- 4.2.3. Izvršena promocija realizovanih aktivnosti.

4.3. Aktivnosti:

Aktivnosti i odgovornosti partnera na Projektu, bit će detaljno utvrđene Ugovorom.

5. Budžet projekta:

Za realizaciju projekta su potrebna finansijska sredstva u iznosu od cca. 1.533.500,00 KM, koja će se obezbjediti kako slijedi:

- Vlada Ze-Do kantona, u iznosu od cca. 200.000 KM od toga:
 - o 100.000,00 KM iz Budžeta Kantona za 2015. godinu i
 - o 100.000,00 KM iz Budžeta Kantona za 2016. godinu;
- Općina Žepče, u iznosu od cca. 120.000 KM na ime obezbjeđivanja placa za izgradnju, potrebnih dozvola i saglasnosti, stručnog nadzora, tehničkog prijema i priključaka objekta na javnu infrastrukturu
- Vlada SR Njemačke, iznosu od cca.1.173.500,00 KM
- Privatne donacije iz Njemačke u iznosu od cca. 40.000,00 KM

Učesnici projekta će odlukama svojih nadležnih tijela obezbjediti planirana finansijska sredstva neophodna za realizaciju Projekta.

7. Nadzor:

Nadzor nad ukupnim aktivnostima od značaja za uspješnu implementaciju projekta vršit će se koordinirano u saradnji svih učesnika projekta (Zeničko-dobojski kanton, Općina Žepče, Ustanova “Dnevni centar za djecu sa posebnim potrebama” Maglaj, Udruženje “Humanost – societas humanitatis” i partneri iz Njemačke).

Zenica, februar 2015. godine

Ministarstvo za rad,
socijalnu politiku i izbjeglice